



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA TANO

Kikao cha Tatu – Tarehe 17 Febuari, 2017.

Kikao Kitaanza Saa 3.00 (Tatu) Asubuhi
na Dua itasomwa.

I. MASWALI:

Ofisi ya Rais, Katiba, Sheria, Utumishi wa Umma na Utawala Bora:

103. MHESHIMIWA OMAR SEIF ABEID (Jimbo la Konde) -
Atamuuliza Mheshimiwa Waziri wa Nchi Ofisi ya Rais,
Katiba, Sheria, Utumishi wa Umma na Utawala Bora.

Kwa kuwa taarifa ya Serikali ya utekelezaji wa haki na ustawi wa mtoto ya mwaka 2015/2016 inaonesha jumla ya kesi 369 za kubakwa na kesi 15 za kulawitiwa ziliripotiwa kwa Unguja na Kesi 25 za kubaka na 1 ya kulawitiwa zilizoripotiwa kwa Pemba. Na kwa kuwa hivi sasa inasemekana kwamba kuna idadi kubwa sana ya matokeo hayo ambayo hayaripotiwi kutokana na wananchi kukata tamaa ya jinsi ya mwenendo wa kesi hizo unavyokwenda ambapo hutolewa visingizio mbali mbali vikiwemo vya ushahidi kutokamilika, jambo ambalo linachangia kwa kiasi kikubwa kuongezeka kwa vitendo hivi.

- a) Je, Serikali haioni kwamba utaratibu uliopo hivi sasa wa kufanyika upelelezi kwanza kunasababisha kesi

kuchukuwa muda mwingi na kutoa nafasi kwa wahalifu kuendelea kufanya makosa kama haya na kusababisha kufutiwa kesi kwa kukosekana ushahidi kama inavyodaiwa na Mahkama.

- b) Ni lini Serikali itaanzisha na kuweka utaratibu maalum wa kuziendesha kesi hizi kwa muda mfupi.

Ofisi ya Rais, Tawala za Mikoa, Serikali za Mitaa na Idara Maalum za SMZ:

45. MHESHIMIWA ABDALLA MAULID DIWANI (Jimbo la Jang'ombe) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ.

Mji wa Zanzibar ni miongoni mwa miji ya Kihistoria Duniani ikiwemo Urithi wa Mji Mkongwe lakini bado suala la usafi katika mji huu halijadhibitiwa ipasavyo vikiwemo vitendo vya watu kujisaidia haja ndogo pahala popote.

Je, hakuna Sheria inayokataza jambo hilo la kujisaidia ovyo ambalo ni aibu kwa nchi yetu.

71. MHESHIMIWA ALI KHAMIS BAKAR (Jimbo la Tumbe) Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Katika Ofisi ya Wilaya ya Magharibi 'B' tumeshuhudia ufinyu mkubwa wa nafasi kutokana na Kitengo cha Afya (D.H.M.T) kukaa pamoja na ofisi nyengine kama ile ya vitambulisho.

- a) Je, ni lini kitengo kile cha (D.H.M.T) kitaondoka ili kuacha Ofisi moja ijitosheleze katika Ofisi hiyo.
- b) Hatuoni kuwepo kwa ufinyu wa Ofisi ile kunapelekea kukosekana kwa nafasi kwa wafanyakazi, ambapo hivi sasa wanakaa watu sita chumba kimoja.

Wizara ya Habari, Utalii, Utamaduni na Michezo:

67. MHESHIMIWA SAADA RAMADHAN MWENDWA (Nafasi za Wanawake) - Atamuuliza Mheshimiwa Waziri wa Habari, Utalii, Utamaduni na Michezo:

Eneo la Maruhubi ni moja ya sehemu za Kihistoria kwa nchi yetu ya Zanzibar. Hata hivyo, katika miaka ya hivi karibuni kumekuwa na vitendo vinavyoathiri haiba nzuri ya eneo hilo vikiwemo vitendo vya ukataji miembe, minazi na miti mengine.

- a) Je, Serikali haioni kwamba ukataji huo wa miti unaondoa haiba nzuri ya eneo hilo na kuharibu mazingira.
- b) Je, Serikali ina mkakati gani wa kuliendeleza eneo hilo la Maruhubi.
- c) Pamoja na lengo zuri la kujenga ukuta katika eneo hilo, lakini bado wapo watu wanaamua kuruka ukuta huo, ni hatua gani zinachukuliwa kukabiliana na vitendo hivyo viovu.

110. MHESHIMIWA SHEHE HAMAD MATTAR (Jimbo la Mgogoni) - Atamuuliza Mheshimiwa Waziri wa Habari, Utalii, Utamaduni na Michezo:

Kwa kuwa kupata taarifa zinazohusu mambo yanayotokea ndani na nje ya nchi yetu wakati wowote kwa mwananchi ni haki yake kwa mujibu wa kifungu cha18(2) cha Katiba ya Zanzibar. Na kwa kuwa Waziri alishatoa tangazo kwa vyombo vyote vya Habari Zanzibar vinavyomiliki ving'amuzi kwamba ni lazima televisheni ya ZBC ionekane kwa muda wote kwa kila anaemiliki king'amuzi ikiwa amelipia au hajalipia king'amuzi hicho, kama vile inavyoonekana TBC katika ving'amuzi vyote nchini.

- a) Je, sababu zipi zinazopelekea king'amuzi cha AZAM TV ikiwa hujalipia, channel ya ZBC haionekani isipokuwa TBC na nyenginezo.

- b) Je, huoni kuwa hii ni kuleta dharau kwa Serikali ya Mapinduzi ya Zanzibar ambayo wewe Mhe. Waziri ndie dhamana wa vyombo vya habari hapa Zanzibar.

Wizara ya Elimu Na Mafunzo ya Amali:

62. MHESHIMIWA ASHA ABDALLA MUSSA (Jimbo la Kiwengwa - Atamuuliza Mheshimiwa Waziri wa Elimu na Mafunzo ya Amali.

Sera ya Elimu inasisitiza wazazi waanzishe ujenzi wa majengo ya skuli na inapofikia hatua ya kuezeka iachiwe Wizara. Hata hivyo, kuna majengo mengi yameshajengwa Unguja na Pemba ambayo yamefikia hatua hiyo, ikiwemo skuli ya Mgambo ndani ya Jimbo la Kiwengwa ambayo bado haijaezekwa.

- a) Je, Wizara ina mpango gani wa kuhakikisha majengo hayo yanamalizwa.
- b) Je, Wizara haioni kuwa majengo hayo kukaa muda mrefu bila kuezekwa yanasababisha wanafunzi kukosa kuyatumia na kurejesha nyuma maendeleo ya elimu.

Wizara ya Kilimo, Maliasili, Mifugo na Uvuvi:

12. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Kilimo, Maliasili, Mifugo na Uvuvi.

Kwa kuwa serikali yetu ina mpango wa kuimarisha kilimo nchini ili kuzalisha chakula cha kutosha na kuachana na mpango wa kuagiza chakula kutoka nje. Na vikundi vingi vya kilimo na mifugo vinajitahidi kuzalisha mazao mbali mbali lakini bado vikundi hivyo havijawa na uwezo wa kuzalisha mazao ya kutosha ili kufikia azma ya Serikali ya kutoagiza chakula kutoka nje ya nchi.

- (a) Je, Serikali ina mpango gani wa kuviendeleza na kuviongezea nguvu ya kifedha na utaalumu vikundi hivyo ili kuongeza uzalishaji zaidi na kuondoa tatizo la chakula katika nchi yetu.

(b) Je kuna vikundi vingapi vinavyotambuliwa ambavyo serikali imejipanga kuviendeleza kwa kusaidia uzalishaji wa chakula nchini na lini serikali itatimiza azma yake ya kuacha kuagiza chakula kutoka nje ya nchi.

Wizara ya Afya:

58. MHESHIMIWA SULEIMAN MAKAME ALI (Jimbo la Ziwani) - Atamuuliza Mheshimiwa Waziri wa Afya.

Tatizo la Madaktari na Maodali katika vituo vya Afya vilivyomo katika Jimbo la Ziwani limekuwa kubwa na kupelekea wananchi wanaokwenda kutafuta matibabu katika vituo hivyo kukosa huduma wakati vijana wenye sifa za kutoa huduma hizo wapo.

Je, ni lini Serikali itawaajiri vijana hao ili waweze kutoa huduma kwa jamii ya watu wa Ziwani.

II. HOJA ZA SERIKALI:

Waziri wa Nchi, Ofisi ya Makamu wa Pili wa Rais:

Mswada wa Sheria ya Kufuta Sheria ya Nembo Nam. 1 ya 1985 na Sheria ya Bendera ya Zanzibar Nam.12 ya 2004 na Kutunga Sheria inayoweka Masharti Bora Yanayohusiana na Bendera ya Zanzibar, Nembo ya Serikali na Wimbo wa Taifa wa Zanzibar ya 2016 na Mambo Mengine Yanayohusiana na Hayo - Kusomwa kwa Mara ya Pili.

Zanzibar,
17 Febuari, 2017.

(Raya Issa Msellem)
KATIBU WA BARAZA.